

Sin viseta en claustera a Mustér

DA HANS HUONDER/FMR

■ **Biebein 40 commembras e commembers dalla Cuminonza dils possessurs da secundas habitaziuns da Tujetsch e dil Forum cultural Tujetsch han visitau la claustera da Mustér la sonda vargada. Pader Theo Theiler ha menau ils interessents atras las localitads.** Avon in onn han las duas organizaziuns envidau per l'empreda ga ad in scunter cultural communabel. Sco quei che la presidenta dalla cuminonza, *Vreni Müller-Hemmi* se-regorda, ei quella sentupada stada en in plum in success. Rodund 60 persunas han visitau lu il Museum La Truaisch a Sedrun. La collaboraziun dallas duas organizaziuns ei vegnida cuntinuada ussa, visitond la claustera a Mustér. «La historia dalla claustera benedictina cun la baselgia gest renovada ha cattaun grond interess», di *Vreni Müller-Hemmi*. Per motivs dil coronavirus ein ils interessents vegni menai en duas gruppas atras las localitads. L'entschatta ei vegnida fatga alla porta principala dalla claustera cun expectoraziuns da *pader Theo* davart la veta dils 19 muntgs, il menaschi naven dil sectur agricol ent-



Interessanta orientaziun da pader Theo Theiler en claustera a Mustér.

ochen il hotel da seminaris ed il gimnasi cun 146 scolaras e scolar.

Sil viadi atras las localitads ha pader Theo orientau – magari era cun empau humor - las gruppas davart la liunga historia dalla claustera. Aschia ha ei dau in temps che la claustera haveva in sulet benedictin sco habitont. La baselgia barocca da s. Martin ch'ei gest renovada e che se presenta en bellezza tarlischur ei in bein cultral da muntada naziunala. En quei connex ha pader Theo fatg allusiun speciala digl altar da renaissance ella nav laterala. El ei vegnius construius dil bab ed il fegl Frosch da Feldkirch ed ei in dils bials da sia specia en Svizra. Ils interessents han saviu prender investa da biars bials objects, denter auter la pli veglia plauna dalla Svizra. «Nus essan stai fetg impressiunai dall'excelenta orientaziun», di *Vreni Müller-Hemmi*. En num dallas gruppas ha *Markus Müller*, responsabel pils fatgs culturals tier la Cuminonza dils possessurs da secundas habitaziuns da Tujetsch, engraziiau a pader Theo. Era per l'auter onn planiseschan la cuminonza ed il forum arranschaments culturals communabels.